



PARLAMENTARNA SKUPŠTINA CENTRALNOEVROPSKE INICIJATIVE

25.-28.11.2010.

Godišnje zasjedanje Parlamentarne skupštine Centralnoevropske inicijative (CEI) održano je u Budvi, 26. i 27.11.2010.

Parlamentarna skupština održana je u dvije tematske sesije: „Prekogranična saradnja između zemalja Centralnoevropske inicijative“ i „Parlamentarna saradnja s civilnim društvom“.

Sastankom je predsjedavao Miodrag Vuković, predsjedavajući Parlamentarne dimenzije CEI-ja i šef Delegacije Parlamenta Crne Gore pri PDCEI-ja.

Sastanku su prisustvovala delegacije parlamenata država članica: Austrije, Bjelorusije, Bosne i Hercegovine, Bugarske, Crne Gore, Hrvatske, Italije, Mađarske, Makedonije, Poljske, Rumunije, Slovenije, Srbije i Ukrajine.

Uvodnim govorima, sa osvrtom na teme sastanka, zasjedanje Parlamentarne skupštine otvorili su: Željko Šturanović, potpredsjednik Skupštine Crne Gore, i Milan Roćen, ministar vanjskih poslova Crne Gore.

Prvu sesiju otvorili su Gordana Đurović, ministrica za evropske integracije Crne Gore, i Clive Rumbold, šef Odsjeka za politiku, evropske integracije i trgovinu u Misiji EU u Crnoj Gori.

Drugu sesiju otvorili su Vasilije Lalošević, član Delegacije Crne Gore u PDCEI-ja, i Marko Čanović, predstavnik nevladinog sektora.

Sastanku su, također, prisustvovali gosti iz Parlamentarne skupštine Vijeća Evrope i Vijeća za regionalnu saradnju, kao i predstavnici diplomatskog kora.

Učesnici sastanka predstavili su svoja nacionalna iskustva u oblastima obuhvaćenim tematskim cjelinama.

Na kraju sastanka Parlamentarne skupštine Centralnoevropske inicijative učesnici su usvojili

ZAVRŠNU DEKLARACIJU

Parlamentarna skupština CEI-ja:

Obilježava 50 godina od ideje francuskog ministra vanjskih poslova Roberta Šumana o stvaranju nove organizacije, koja je prerasla u zajednicu 27 evropskih država sa stanovništvom od oko pola milijarde ljudi i zajedničkim motom „Ujedinjeni u različitostima“;

Ima u vidu da je cilj Centralnoevropske inicijative integracija svih članica CEI-ja u porodicu evropskih država, te posebno naglašava spremnost onih država članica CEI-ja, koje su već članice EU, da daju doprinos u pogledu osiguravanja različitih vidova podrške državama koje su u procesu pridruživanja;

Uvažava odluku Evropske komisije o neophodnosti daljnjeg proširenja kada su u pitanju zemlje zapadnog Balkana, kao i zaključke i preporuke u godišnjim izvještajima o napretku za zemlje kandidate i potencijalne kandidate;

Pozdravlja mišljenje EK o zahtjevu Crne Gore za članstvo u EU sa zaključcima i preporukama za davanje statusa kandidata uz očekivanje odlučivanja skorog datuma procesa pregovora;

Posebno cijeni konkretne korake koji se čine na približavanju država kandidata i potencijalnih kandidata EU, apostrofirajući važnost odluke o viznoj liberalizaciji za Albaniju i Bosnu i Hercegovinu;

Podstiče daljnje korake ka liberalizaciji viznog režima između država članica CEI-ja.

Podržava trend jačanja parlamenata na nacionalnom nivou, ali i važnosti nacionalnih parlamenata u odnosu na politiku Evropske unije koja proističe iz Lisabonskog ugovora;

Naglašava da je formula za svjetliju budućnost ujedinjene Evrope: mir, sigurnost, širenje tolerancije, razumijevanje i međusobno poštovanje, ekonomski razvoj, izgradnja pravne države i efikasnih institucija sistema zasnovanih na evropskim vrijednostima i standardima;

Pozdravlja Milenijske ciljeve razvoja koji se ogledaju u iskorjenjivanju ekstremnog siromaštva i gladi, postizanju univerzalnog osnovnog obrazovanja, promoviranju rodne jednakosti, smanjenju smrtnosti kod djece, poboljšanju zdravlja majki, borbi protiv HIV/AIDS-a, malarije i drugih oboljenja, osiguranju održivosti životne sredine, kao i u stvaranju globalnog partnerstva za razvoj i, u tom smislu, cijeni nastojanja država članica CEI-ja da dostignu Milenijske ciljeve kroz uspostavljanje i provođenje odgovarajućih instrumenata;

Podsjeća na raspoloživa sredstva za realizaciju projekata prekogranične saradnje i, u skladu s tim, poziva na izradu projekata koji će dovesti do jačanja veza naroda i država članica CEI-ja;

Poziva države članice CEI-ja da posebnu pažnju usmjere na promoviranje zajedničkih projekata članica EU i onih država članica CEI-ja koje ne pripadaju Uniji, projekata koji su u vezi s razmjenom znanja i iskustava, što se pokazalo kao najefikasniji i najstimulativniji mehanizam za prijenos iskustava u svim razvojnim oblastima;

Potvrđuje činjenicu da će države članice CEI-ja nastaviti da razvijaju dobrosusjedske odnose, kao i da podstiču konstruktivni dijalog i projektno orijentiranu regionalnu saradnju;

Poziva na čvršću saradnju između vladine i parlamentarne dimenzije CEI-ja, kao i na jačanje saradnje Parlamentarne dimenzije CEI-ja s drugim regionalnim organizacijama i inicijativama, s ciljem jačanja uticaja svih inicijativa na bolje odnose u regionu;

Podsjeća na tri ključne oblasti koje su identificirane Akcionim planom CEI-ja za period od 2010. do 2012.: ekonomski razvoj, institucionalni razvoj i horizontalni instrument (interregionalna i prekogranična saradnja) i naglašava da će uspješnost ispunjavanja obaveza iz plana zavisiti od država članica CEI-ja, tj. od spremnosti da doprinesu ostvarenju cilja, a to je zdrava (održiva) regionalna saradnja;

Izražava interes nacionalnih parlamenata država članica PDCEI-ja za uspostavljanjem bliže saradnje i razmjene iskustava s ciljem pronalaženja efikasnog parlamentarnog odgovora u dijelu koji se odnosi na parlamentarnu saradnju s civilnim društvom i transparentnost u radu;

Svjesna važnosti uključivanja svih aktera društva u izgradnju parlamentarne demokratije, naglašava neophodnost intenzivnije saradnje s civilnim sektorom kroz sve raspoložive mehanizme;

Ohrabruje napore parlamenata za identificiranjem zajedničkih ciljeva koje je moguće ostvariti kroz saradnju s civilnim sektorom;

Cijeneći povezanost nevladinih organizacija s raznovrsnim ciljnim grupama, **ističe** potrebu razvijanja ideja i pogodnih mehanizama saradnje s ciljem podizanja svijesti građana o parlamentarnim aktivnostima;

Poziva parlamente država članica PDCEI-ja da proaktivnim pristupom podrže, artikuliraju, unaprijede i uspostave tješnju saradnju u dijelu koji se odnosi na realizaciju projekata s ciljem jačanja administrativnih kapaciteta parlamenata, i unaprijede uslove za jačanje parlamentarne saradnje s civilnim društvom;

Izražava najiskrenije želje Republici Srbiji za uspješno predsjedavanje Centralnoevropskom inicijativom u 2011. godini.